



Politička organizacija građana "Naša stranka"
Branilaca Sarajeva 5/1, 71 000 Sarajevo
Telefon: 033 408 888; Fax: 033 408 881
E-mail: nasastranka@nasastranka.ba
Web: www.nasastranka.ba

Predrag Kojović
Delegat u Domu naroda Parlamenta Federacije Bosne i Hercegovine

Broj:
Sarajevo, 23.03.2017.

Bosna i Hercegovina
FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
DOM NARODA
SARAJEVO

Primljeno:	24-03-2017		
Org. jed.	Broj	Priloga	Vrijedno
02-	02-	405	16 10x

Dostaviti:
Bosna i Hercegovina
Federacija Bosna i Hercegovina
Parlament Federacije BiH
DOM NARODA
n/r Lidija Bradara, predsjedavajuća

PREDMET: Amandmani na Prijedlog Zakona o penzijskom i invalidskom osiguranju

Poštovani/e,

na osnovu člana 177. i 178. Poslovnika Doma naroda Parlamenta Federacije Bosne i Hercegovine („Službene novine Federacije BiH“, broj 27/03 i 21/09), dostavljam vam amandmane na **Prijedlog Zakona o penzijskom i invalidskom osiguranju**.

Prijedlog sa obrazloženjem na bosanskom jeziku i elektronsku verziju istog, možete naći u prilogu.

S poštovanjem,

Predrag Kojović
Delegat u Domu naroda Parlamenta Federacije Bosne i Hercegovine
Naša stranka

PREDRAG KOJOVIĆ
DELEGAT U DOMU NARODA PARLAMENTA FEDERACIJE BOSNE I
HERCEGOVINE
NAŠA STRANKA

AMANDMANI

AMANDMANI NA PRIJEDLOG ZAKONA O
PENZIJSKOM I INVALIDSKOM OSIGURANJU

Sarajevo, mart 2017. godine

Na osnovu člana 177. i 178. Poslovnika Doma naroda Parlamenta Federacije Bosne i Hercegovine („Službene novine Federacije BiH“, broj 27/03 i 21/09), dostavljam vam sljedeće:

AMANDMANI NA PRIJEDLOG ZAKONA O PENZIJSKOM I INVALIDSKOM OSIGURANJU

AMANDMAN I

Član 19. stav 1 se mijenja i glasi :

« 1) Dobrovoljnim penzijskim i invalidskim osiguranjem osiguranici mogu, u skladu sa posebnim zakonom, obezbjediti sebi i članovima svoje porodice veći obim, kao i drugu vrstu prava od prava utvrđenih ovim zakonom, ako imaju prebivalište na teritoriji Federacije ili teritoriji Brčko Distrikta, imaju opću zdravstvenu sposobnost, ako su stariji od 15 godina a najkasnije do navršene 65 godine, te ako su državljani Bosne i Hercegovine.»

U članu 19. dodaje se stav 2) koji glasi :

« 2) Lica koja nisu obavezno osigurana u smislu ovog zakona mogu, dobrovoljnim penzijskim i invalidskim osiguranjem, u skladu sa posebnim zakonom, sebi i članovima svoje porodice obezbjediti prava iz penzijskog i invalidskog osiguranja i druga prava u skladu sa posebnim zakonom. Dobrovoljno penzijsko i invalidsko osiguranje mogu organizovati i sprovoditi pravna lica, u skladu sa posebnim zakonom.“

Obrazloženje:

Ovim članom se jasno definišu načini ostvarivanja dobrovoljnog penzijskog i invalidskog osiguranja, te smatramo da je neophodno definisati unutar teksta zakona kako će se ova vrsta osiguranja moći obezbjediti. Dopuna koja jasno upućuje na zakone koji se bave dobrovoljnim osiguranjem je preciznija u odnosu na formulaciju člana čija izmjena se predlaže.

AMANDMAN II

Član 71. se mijenja i glasi:

«(1) Udovac ima pravo na porodičnu penziju:

- a) ako je na dan smrti supruge navršio 50 godina života,

- b) ako je na dan smrti supruge bio potpuno nesposoban za privređivanje, odnosno ako je takva nesposobnost nastala u roku jedne godine od dana smrti supruge,
- c) ako je poslije smrti supruge ostalo jedno ili više djece koja imaju pravo na porodičnu penziju, a on obavlja roditeljske dužnosti prema toj djeci.

(2) Udovac kome pravo na porodičnu penziju ostvarenu prema odredbama stava (1) tačka c) ovog člana prestane prije navršenih 50 ali poslije navršenih 45 godina života može ponovo ostvariti pravo kad navrší 50 godina života.

(3) Udovac koji nije ostvario pravo na porodičnu penziju u skladu sa stavom (1) tačka c) ovog člana, iako je ispunjavao uslove, može ostvariti pravo na porodičnu penziju i nakon prestanka prava na porodičnu penziju djece, pod uslovima utvrđenim ovim zakonom.

(4) Udovac koji u toku korištenja prava na porodičnu penziju ostvarenu u skladu sa stavom (1) tačka c) ovog člana postane potpuno nesposoban za privređivanje zadržava pravo na porodičnu penziju dok postoji takva nesposobnost.

(5) Udovac koji u toku korištenja prava u skladu sa stavom (1) tačka c) ovog člana navrší 50 godina života zadržava pravo na porodičnu penziju.

(6) Udovac koji do smrti supruge nije navršio 50 ali je imao navršenih 45 godina života ima pravo na porodičnu penziju kad navrší 50 godina života.

(7) Udovac koji je do smrti supruge ili do prestanka prava na porodičnu penziju navršio 45 godina života ima pravo na porodičnu penziju prije navršenih 50 godina života, ako postane potpuno nesposoban za privređivanje.

(8) Izuzetno od uslova propisanih u st. (1) do (7) ovog člana, udovac šehida-žene, odnosno poginule braniteljice, ima pravo na porodičnu penziju kada navrší 50 godina života.

Obrazloženje:

Po pitanju starosne dobi vezane za ostvarivanje porodične penzije, smatramo da ne treba da postoji starosna razlika između udovaca i udovica u smislu člana koji definiše sticanje prava, te se predloženi amandman odnosi na činjenicu da uslovi za ostvarivanje penzije moraju biti jednaki i za muškarce i žene. Također, smatramo da nema potrebe da se pravi razlika za sticanje porodične penzije te da uslovi za oba pola moraju da budu izjednačeni.

AMANDMAN III

Član 88. se briše.

Obrazloženje:


Član 88. je diskriminirajući prema licima koja imaju dobrovoljno osiguranje u smislu da osobama koje imaju dobrovoljno osiguranje u slučaju profesionalne bolesti ili povrede na radu nisu obezbjeđena nikakva prava. Smatramo da ne postoji opravdan razlog za diskriminaciju ovih lica u odnosu na osiguranike iz obaveznog osiguranja, posebno jer će dobrovoljno osiguranje biti regulisano posebnim propisom.

OBRAZLOŽENJE PREDLOŽENIH AMANDMANA

Svaki predloženi amandman ima utvrđena konkretna obrazloženja i okvir zbog kojeg upućujem prijedloge izmjena i dopuna Prijedloga koji smo zaprimili od ovlaštenog predlagača – Vlade Federacije Bosne i Hercegovine.

Amandmani su sastavljeni u saradnji sa pravnim stručnjacima i ekspertima iz različitih oblasti relevantnih za osiguravajuću politiku, ali i kroz konsultacije sa poduzetnicima. S tim u vezi, pozivam zastupnike i delegate u Parlamentu Federacije BiH, ali i Vladu Federacije Bosne i Hercegovine, da prihvate predložene amandmane.

S poštovanjem,



Predrag Kojović

Delegat u Domu naroda Parlamenta Federacije Bosne i Hercegovine

Naša stranka

